

Buna sira! Buna sira! Me cari siuri, e ben c'me cla va? Istani a l'è in Gilindu ampurtont, a l'è in Gilindu da gala: ist'ani a festegiuma i 50 ani dla rapresentasion!

S. Peder ist'ani quondi cu ma tirà fora dant'iarmari e i cason per gavem la naftalina, u ma mandà da l'ongel ch'el fà el pruchè a fem a tücc la "messa in piega", u ma fen fac cutunè el barbi, as suma bità i suclòn da la festa, cui senza strenghi, e trüccà acsei, da manifestasion uffical, a cavà d'la nostra steila a suma partì per Lisondria per avnì chi dai Frà a dei ancora in gir a sta Divota Cumedia.

Noi a javu in idea nova per u sinquantenario, a suma andac da u sendi-ch per avei el permes ad fè sta rapresentasion an tin lucal nov che a Lisondria ui na jè meja d'ugual, forse, bel acsei u jè ammac el palasi dla posta an piasa gronda.

Aurivu recitè an tu teater nov, lei an ti giarden. U siur Borgoglio, cl'è jèn cla el cor an mon, u ma assicürà che per ades a lè nent pront, ma che per u sentenari um la cunedarrà certament.

Voi i dirrei che dop cinquantani a l'è ura ca vagu an pension, ca la piontu lei ad fè el medesim robì; jei rason, i son semper el medesim robì, el medesim paroli, ma i vighi i son el paroli ad buntà e d'amur che da 2.000 ani u Siur Messia la dicc ad ripeti an tut el mond, a tuc'iomì ad boina vuluntà, e anche noi da pover uataron, an lisandren, a continuuma a dii cun la cunvinsion chi vagu semper bem, per chisà per quonta temp ancora.

Eh! um dispias che l'ani del sinquantenari a l'è in ani ad crisi, in ani d'austerità, a suma stacc in meis a mes cun el guvern an crisi, a j'uma tacà na ciapa propi ades, l'onorevole Moro la bità ansema in nuovo "gabinetto".

Eh! gram Moro, cun tüt la gent c'la cioca, a l'è at che Moro, a lè neier cme in capè da previ! Eh! me gara gent u dollaro el va sü, el marco el va sü, semper pu sü, ammac la lira lè semper ferma an mes na strà e us vigh ansèn cu la tira sü.

Us sa pü se mangè, gavà d'la sturnera, e di fasulèn da l'ogg, tüt la roba l'ha di presi da fè girè la testa; dal maslè us va pü per crumpè la carn da fè buji, ma per fè di regal; quondi cui nas na masnà, anveci d'regalei na

cadnëta d'or, ai duma in para ad cutlëti. A pruposit d'l'or, stei atent vuiater ch'jei cuc dencc d'or an buca, arji pü, tni i dencc ben anciavà, che s'uv vigh cuc bandì, el po cunbinè na rapina, e purtev veia la dente-  
ra!

A lè inütìl, tüt el graini i son acmensai da quondi sa povra gent di seicchi j'on decis d'aumentè el presi del petroliu; e cus benedet petroliu us fa ropi tüt, anche i siras e i strachen. Ades però a l'uma truva anche an Italia, u smeia fina cui seia soutà fora in filon chi al Mandrogn, eh! le i son di dritu, i son di mandrogn, j'on facc pasè na guma suta tera cla vè a tirè fora el petroliu da suta i pe a i'arabi; speruma ammac chi i s'nantaiu nent, se no im mondu chi i Fedajin!

A lè in periodo però che as sentuma tücc pü ampegnà an tla demucra-  
tisation, tücc a partecipuma pü tont a fè andè avonti el robì, a truvuma  
quasi pü u temp ad fè na brüsca o na scupëta, tüt el siri i son ampegnai:  
riunion di condomini, comitato d'la parochia, comitato di quartiere, ades  
j'on trovà la manera ad mandem turna a scola, cun si decreti delegati!  
Speruma ammac chim fasu nent studiè la lesion a noi al posto di noster  
fanciot. Pensè chi stüdiu tücc tont, i parlu tücc an laten, an gir at senti  
ammac parlè d'"Una tantum"; e anche a scrivi i scrivu tont, i scrivu  
dapertut: an si quadernu, an si liber, fin an sel maji, i gipon i scrivu,  
"iuniversity", e quondi ch'ion pü meia ad post andò scrivi i scrivu an sel  
mirai, i son tuti beli peini.

Anche chi a Lisondria u j'è stacc di cambiament; istani a lè stacc l'ani  
d'l'isola pedonale. Finalment u centro dla sità a lè liber ad tüt is machini  
chi fon in burdel da furca, us sava pü andò pasè.

Finalment an piasëta dla Lega, us pö senti cantè i'auslèn.

Va ben che al post del machini ui pasa ogni 5 minut, 7 o 8 filobus gros  
cme na ca, va ben che quondi chi s'ancrusiu absogna tres tucc anti pur-  
tòn, per nent fes gnachè i'oggpulen. Pü che in isula pedonale um smeia  
u recinto dü Circo Togni.


Dato però che da ot e mesa a mesdì si cardansòn i son semper beie voi,  
e ad scoli an periferia ui na j'è pochi, tücc i student chi van a scöla,  
anveci ad calè sü, i fon andè ansüma i profesur al post del filobustiere  
(cul ch'el guida el filobus us ciamli acsei?) e acsei na quaranteina d'auli  
i venu fora.

Ciaciara, ciaciara am smentiava sa ad ringrasiè tücc sti bravi Frà, che  
da 50 ani im suportu cun tonta pasiensa, tücc i noster Asistent, P. Fran-  
cesco, P. Arcangelo, P. Agostino, e cul chi'uma adès P. Alessandro! In

ringrasiament particular a duvuma propi feli au noster meister, pu che in meister a l'è u noster Profesur d'Università "U siur Arnoldi" che da la prima vota, fina ades a la mai mulà, ul fà magari cun na gomba sula, c'me Enrico Toti. Eh! per noi ca fuma sta divota cumedia, u siur Arnoldi l'è propi stacc l'uomo della Provvidenza.

Adès a stralas, se no i disi che per senti na predica, andava an Cesa a pagava gnent du tüt, e im la favu pü bela!

Av present la me famija...



Pietro Binasco - *Maffeo*.